

KOLOSEFO

Kukue Ko Paulo Lɛwɔni Útə Kolosefo

¹ Mɔ, Paulo, wə ɛye lə Onanto eto ketsyue əsuə eso mimfiani Kristo Yesu eto ɔtɔnkpee, boko bo ɔyimisani Timoteo wə nɛ kukue komfo bɔwɔni. ² Bufi ko bɔɛ bo bayimi ba nkpe lə Kolose ba díkafo Kristo b́áɔ sitinti butə. Bɔɛ Onanto wə ni bo Anto b́ɔɔ boə lə ufi wə lefonə ku diyue utə mi.

Paulo Ásɔ Onanto Ani Lə Kolosefo Eto Disi.

³ Lefe saa lə bɔɛ ola botoo, boaso Onanto wə ni Bonamute Yesu Kristo eto Anto ani lə mi disí. ⁴ Itsyise b́ɔɔ kase b́efo Kristo Yesu bɛɔ ku kase biala mi bayimitsyue bafokanɔfo kenke. ⁵ Lefe nə Ditiki Sɛɛ tinti nɛmə leka mi ɔflo bubəə, bɛɔ kusubebe ko nkpe lə ni. Yanso mi bɔfokanɔ ku lelabi teke lə lesa nə bɛnɛ kusu bobɛ balɔ b́ɔtsyɛ mi lə Onanto eto kato əsuə. ⁶ Ditiki Sɛɛ nɛmə lə bobɛ kakpe nya lɛnɛ ebibi bɔnwɔ lə kawunsiə kamə kenke, fe kase díyifo lə mi tsya əsuə seka, idu lefe nə bɛɔ kase Onanto ləənə utidi kafo nya bɛɔ ni kasɔ tututu. ⁷ Bɛɔ Onanto eto lefonə nɛmfo eto etiki ɛye lə bo uyifotsyue lala Epaфра wə díyifo Kristo eto keyifo ku ɔnukuale lə bo kenye. ⁸ Wə díbɛ ɔtɛyi bo lelabi nə Onanto eto Lɛwɔnɔ nɛmə dífi útə mi.

⁹ Lə nya esoo, idu lə lefe nə b́ɔɔ mi kɔsɔɔ, búkato ola lefe saa lə mi disí kato Onanto boə, ufi wə bote ku lelabi eto nsusu okpe mi

lè əsuə, εye lè kobe kenke ku kasɔnɔnɔ ka Lɛwɔnɔ nəmè ləətə əsuə. ¹⁰ Itə lè befo nkpe busiə fe kase Bonamute əmə laala nya lè bofo wə lelabi buyifo lefe saa. Lè mi nkprəsiəsiə lè buyi ku kasɛyifoyifo ku Onanto eto bote kakpe. ¹¹⁻¹² Onanto lè ufi wə əsuəale kplɛ nnya ntəkə əsuəale saa kato okpe mi lè befo buńyè lè bulè saa eto kɛnyɛ ku dibusə. Lè bifi disuənyuə ku lɛninsɔ bitə Boanto Onanto wə dítə bóflɔ bofo kedikɔ bunyè lè nka ólɔ útsyuə wə betidi lè wə sekakedikɔ eto diyənde əsuə. ¹³ Wə díləkə bo utsyiko lè ketuntu eto əsuəale əsuə nya ókpa bo oboko wə Ubi lala eto sekakedikɔ. ¹⁴ Nwə əsuə εye búnyè bofo itə úfi bo abua ótsyɛ bo.

Nwə Eto Okle Ni Onanto Eto Ubi Emə Ku Keyifo Ka Úyifo.

¹⁵ Kristo eto ditsyəbi ələkə Onanto wə boənyə ku ənəmi eto ditsyəbi kate. Okɛ fɛ béyifo asayifoyifo saa kenke. ¹⁶ Itsyise εye lè wəə, nya Onanto díyifo asa nnya kenke nkpe kato ku kasɔ, nnya bəənyə ku nnya bənnnyə, ekɔ lə awɔnɔ eto əsuəale kenke, banamute, baka ku əsuəalefɔ saa tsya eto okle. Onanto éyifo kawunsiə kenke εye lè wə itə wə. ¹⁷ Kristo akɛ fɛ Onanto díyifo lesa saa, nya εye lə lɔniyifoyifo ku wəə, nya lesa saa dínyə ni kəńyənko pɛpɛpɛ nɛ. ¹⁸ Wə ni disi itə wə əsuə nnya ni bafokanɔfɔ eto ditsyukpa nəmè. Wə ni kaka diənyə ni nkpe ketsyiko. Onanto eto Ubi əmə ni ututɛ nya wə ni nwə létaka utsyiko okɔmə úbè nkpe, bə lə udi ututɛ lə asa nnya kenke nti. ¹⁹ Iyifo Onanto eto lalabi nkə

ditsyabi nə tutuutu nkpe wəə, lə ləkə wə ubi əmə tsya. ²⁰ Isi iyifo wə lelabi tsya nkə lə uyifo bani ku kawunsiə kenke, nnya nkpe lə kasə mfo ku nnya nkpe kato kenke. Ubi əmə eto kətə ko ókpo kasə eyə lə wə ukpə lə uyikabie esuəə, ko dínə diyuə nəmfo leboko nɛ.

²¹ Kə kabia ákəe lə mi ku Onanto eto nti, nya bikisi wə lə mi nsusu kəmiə lə abua nnya biyifo eso. ²² Fə mómə, úsikli ófo mi kafa faa, eyə lə uyikabie eto ukpə wə Ubi díkpe lə mi disi eso. Eyə lə ukpə əmfo əsuəə, nya Onanto dísinkli ólo mi utsyə lə wə ənəmi fe mba bəfləsə ntu nya keni nye dikpilolo saa ləmbə lə əsuə, lékpa kenke seka. ²³ Nyaso efe tinti bə befo buńyə bələ mi bəfokanə lə kəni kekkeke. Bunte kekkeke lə bofo bunyə sitinti, nya boembu ləkə bo nsusu butsyiko lə kusubebe ko Ditiki Sɛɛ nəmə dinə léboku bo əsuə. Ditiki Sɛɛ nəmfo əsuə bábə letsya bətə kawunsiə eto asayifoyifo kenke, nnya eto uyifoyifo mə Paulo díbə ófiani.

Paulo Éyifo Keyifo Fe Bafokanəfo Eto Ditsyukpa Eto Uyifoyifo.

²⁴ Mómə, iyifo mə disuəyuə bə nle kanyi bunyə lə mi disi eso. Nya kanyi ka minlə bunyə lə əsuə eto sinə əsuə mfoo, lə mə bəwunsəko bə lə mfləsə Kristo eto kanyi útə nkə nyə lə bafokanəfo eto ditsyukpa nə ni wə əsuə eto sinə eto disi. ²⁵ Onanto átsyese mə nkə mfiani wə uyifoyifo bə lə mbe wə ditiki nəmə letsya ntə mi ku betidi ba kenke lə banə kasə ekpa wuee. ²⁶ Ditiki Sɛɛ nəmfo eyifo lekulasa kə, nya úkələkə óte wə betidi. ²⁷ Onanto eto

ketsyue keni bæ læ ulækə akulasa nyamfo ote wə betidi læ bate, akulasa fo asi nya diyi ku atesə mfo. Nya akulasa nyamfo ni bæ Kristo nkpe læ mi ketu kəmiə itə mi tsya nkpe kedikə læ Onanto eto diyənde əsuə. ²⁸ Nya Kristo əmfo bənlə letsya bobə kətə utsyuə saa nɛ, nya læ kobə saa əsuə boalɛ mə kolɛ kate mə asa bæ læ bokpa mə utsyuə saa busuko Onanto eto ənəmi fe mba diyifo bani ku Kristo ba dikabə baflo seka. ²⁹ Nyamfo eto otsyekle mimlə kakplatsya ku əsuəalə nnya kenke Kristo leefi kakpe mə læ əsuə nnya nlɛ keyifo læ mə nɛ.

2

¹ Nla miə betə lekplatsya nə minlə læ mi ku Laodikeafo ku betidi ba kenke bo ku mə dimantsya tɔ ənəmi ku ənəmi bote bətsyuə eto disi. ² Meeyifo nko bæ læ bənyə əsuəalə læ mə ketu kəmiə læ beyifo bani tsya ku mə bətsyuə læ lelabi əsuə. Isi ensoo, itə kase boofə asa kasɔ bɔnɔ kukɔnɔ, bæ bətsyə lekpo Onanto eto asakulakula əmə ni Kristo. Nyamfo ni bikesinɔke bia lefo koya tinti. ³ Kristo ni safui sia laasini Onanto eto kobə ku kobetete eto akulasafo koya nyamfo. ⁴ Nyaso nlɛ mi bɔtɔyi minke biəntə læ kuutsyuə saa læ ɔwɛ mi okpe ku etiki eto kənə bimba niə niə niə ete fe ɔnukualɛ kpe læ nnya tsya. ⁵ Itsyise ite bæ bənlə mə bunyə læ əsuə eto sinə əsuə tsyaa, nkpe læ mi nti læ ləwɔnɔ əsuə, nya iyifo mə disuənyuə læ kase bəkɔ binyə kekkeke læ mi Kristo bofokanɔ əsuə eso.

Utidi Eto Nkpesiəsiə Bo Leflɔɔ, Kpe Lə Kristo Kəmiə.

⁶ Kase befo Kristo Yesu ku mi ləkɔəsi kenke fe mi Onamutee, biyifo bani ku wə nko. ⁷ Bitə lə keyudu lə kənyə kedufəkɔ katsyo lə wə, fe kuyi eto keyudu leedufe lə kasɔ. Beto mi nkpə bitəkə lə wə mi bofokanɔ lə bumuə ale fe kase báte mi. Lə biyi ku leninsɔ itə Onanto lefe saa.

⁸ Nyaso bebe biə kuutsyuə saa manwɛ mi uyifo mi ndomufɔ eyɛ lə betidinini eto kobetete bimba ko nyɛ lə akpa nya báyani bətsyə betidi ku kawunsiə eto awɔnɔ eto əsuəale eto kate ka lanyɛ lə Kristo eto asatete eto esu əsuə.

⁹ Itsyise Onantotidi eto ditsyəbi kenke nə leflɔ akɛ lə Kristo eto əsuəale eto sinə əsuə lə wə utidididi eto ditsyuəbi nəmə əsuə. ¹⁰ Nya se buyifo bani ku wə, wəə ni disi itə awɔnɔ eto əsuəale saa ku awɔnɔ eto baka saa, ete bə bo nkpə tsya aflɔ lə kusu saa əsuə.

¹¹ Se buyifo bani ku Kristo eso biyifo fe mba bála lelo, inni lə kase kawunsiə eto betidi leeyifo, bomuu eyɛ lə Kristo əsuəə, Onanto ələkə mi ɔbɔnko lə əsuə eto sinə eto abuyifoyifo eto əsuəale eto kalɔ. Nyamfo ni lelo nə bála mi eyɛ lə Kristo əsuə nə. ¹² Itsyise lefe nə bəfləsə mi ntuu, bəbikə mi ku Kristo, nya eyɛ lə nnya əsuəə, batakasə mi bənyənsə ku Kristo lə mi bofokanɔ eso, lə Onanto eto əsuəale nyamə əsuə, wə nwə ni létakasə wə utsyiko ɔkɔmə óboko nkpə.

¹³ Lefe ditsyuə nə léfee, bíkpe lə lɛwɔnɔ əsuə lə mi abua nnya bíyifo eso, itsyise biedi Yudafɔ ba dímanke lə kɔfi kalɔ. Fɛ mɔmɔɔ, Onanto ébokpa mi óboko nkpə kəmiə ku

Kristo. Onanto éfi mi abua kenke ótsyε mi. ¹⁴ Ótsya ɔfiɔ læ kayo ka búsiə ku nnya afi nnya kenke lékle bo úləkə bo læ nnya əsuə kenke óso læ uyikabie əsuə ku Kristo. ¹⁵ Nya læ uyikabie komfo əsuəə, Kristo ələkə wə əsuə óbonko læ awonɔ eto əsuəale ku baka saa eto kalɔ nya ótsyilamako mə ókpe mə kofani nya úləkə mə óte fe ndomufɔ ba óso ani utəkə mə kato.

¹⁶ Nyaso biətə læ kuutsyuə saa læ okpe mi afi læ lesa nə biudi nye biunə lee biembudi nye buinə əsuə, nye nnya ni eyi sεε lee, læ kofa fɔfɔ abe lee nye ɔnwɛditsyayi əsuə.

¹⁷ Nyamfo kenke eyifo nnya nkpe kama εnlε bubə eto koyo ete! Nnya eto koyo bεnlε bunyə ni Kristo kosate. ¹⁸ Biəntə læ ənəmi ənəmi eto utidi kuutsyuə wə laatəyi nkə utətə kato itsyise wəənyə ənətəkətəkə eto kələkəkate, ba laayinkə betidi kakpe læ kawε eto əsuə bokosəbokosə kasɔ ku kato eto batɔnkpe eto bɔsumu əsuə læ balo mi dikpi. Asa bimba ku utidi eto nsusu ləkələkə ete ini. Lə bitəkəko utidi əmfo eto okle eto kamaa, biemunyə asa nnya eto kama bεnlε bati. ¹⁹ Nwəmfo eto okle mɛnsikɔ uyifo lɔni læ Kristo, wə nwə ni disi utə utidi əmə. Wə əsuə utidi əmə eto əsuə eto nlokɔ ku wə əmə eto umu kenke tsya nkpəsə, wə ɔfiɔ wəənyə lesa sεε saa, nya woabe fe kase Onanto laala.

Nkpefɔfɔ Siəsə Eyε Lə Kristo Əsuə.

²⁰ Se bɪkpə ku Kristo esoo, bεbɔ læ kawunsiə eto awonɔ eto əsuəale kalɔ. Beso binsi biətə baakpe mi afi fe bisi bekpe læ kawunsiə kamə kalɔ seka? ²¹ Beso biesikeyifo læ nnya əsuə læ

baateyi mi bənkə bienyifo nyamfo eto keyifo ku biandia nəmə bebe nye bientidi nə nse? ²² Asa nnya eto afi bákpe mi mfo eyifo asa nnya lə beyifo nnya keyifo balosə koo, iyifo ebimbasa nnya lensibe kutəkə saa. Afi nyamfo kenke eyifo betidi eto ketsyue ku asatete ete. ²³ Ele fe asa nnya báteyi mi mfo te fe kobe kutsyue kpe lə nnya nya iyifo fe bələkə nnya betsyiko lə Onanto eto ketsyue ka útsyue utsyə əsuə. Yəətə bə utidi bokosə əsuə kasɔ, utə wə əsuə eto sine nyə kanyi nnya luutə ola Onanto oso ku ofo əsuə bumuə kalɛ. Fɛɛ asa nyamfo eto okle buyifo anwunsəko kuutsyue bə lə oso wə əsuə eto sinə eto alasa ani.

3

¹ Se ini botakasə Onanto létakase mi ku Kristo utsyiko ɔkəmə óboko nkpə esoo, beti asa nnya nkpe kato kama kaka Kristo kosate nsi lə wə lekankpome əsuə lə Onanto eto kodiani. ² Bitə mi nsusu lə butəkə lə asa nnya nkpe kato mfó əsuə, inni lə asa nnya nkpe lə kasɔ mfo. ³ Itsyise se bíkpee, mi nkpə efi bokpe lə Kristo eto nle əsuə bo ləbiɔ bonkpe lə Onanto əsuə tsya. ⁴ Mi nkpə kosate eyifo nkpə lə Kristo əsuə. Nya lefe nə wɔɔbɔ bənyəə, mi tsya ebɔbɔ ku wə nya buinyə kedikɔ lə wə sekakedikɔ eto diyənde əsuə.

Befiani Betidi Fɔfɔ.

⁵ Nyaso belo kasɔ mfo eto asa eto nkpə bo nkpe lə mi əsuə fenke asɔnɔdidi, asi-nasayifoyifo, əsuə eto sinə eto kamininyənyə, kənənsɛ lə kawunsie eto bikə bɔkɛ əsuə sia

diyifo ufīesumusumu. ⁶ Asa nyamfo eto okle əənə Onanto eto ləbləfi kaboko mba ditidi ato lentsyue wə koto əsuə. ⁷ Lə nkpe bo bisie kə əsuə, mi tsya éyifo asa nyamfo eto kakle.

⁸ Fεε mómó, ele bə beye asa nyamfo kenke eto kakle buyifo nnya ni əblənyənyə, lefonyi, kabua bəbεbe kətə fə utsyuə, aka ku etikibua saa didi. ⁹ Se bīkələkə mi ditsyəbi koko nəmə ku ni eyifosa lə mi əsuə esoo, biesitəyi bətsyuə bidia bio. ¹⁰ Bifi békpe lə ditsyəbi fəfə nəmə əsuə mómó. Nya ditsyəbi fəfə nəmfo ni wə Onanto kosate eto ditsyəbi nə ənlε bufi kakpe lə mi lefe saa, lə bėbė bisu setə bə lə bibə bete wə bewunsə.

¹¹ Lə nyamfo esoo, kaba kəfə saa ensibə lə mba lenni Yudafo ku mba ni Yudafo, mba bala alo ku mba bānla alo, bafə ku mba dimankpa əsuə, ndomufə ku mba nsi lə mə əsuə əsuə nti. Məmblə kenke eyifo bani lə Kristo əsuə, nya Kristo nkpe lə məmblə kəmiə.

¹² Mimbə eyifo Onanto eto betidi, nya óla mimbə nya úləkə mimbə uyifo wə kosate eto bale. Lə nyasoo, bifi ditsyəbi nə dińyə ditə nkome seka beyenko əsuə. Nya ni kamin-sənyənyə, kafoekpe, əsuə kasə bokosəbokosə, diyuəsə ku disuətsyuə. ¹³ Bitsyəsə ku mi bətsyuə, lə bifi bətsyε bətsyuə lə utsyuə áta wə utsyuə ubu. Ele bə bifi bətsyε bətsyuə fe kase Bonamute dífi ɔtsyε mi. ¹⁴ Əwunsə lə nyamfo kenke əsuə, bifi lelabi bitə bətsyuə, itsyise ni laakə lesa saa kalε lə bətsyuə keyifo mə bani nε.

¹⁵ Kristo eto diyuə nə wətə, lə didi seka lə mi ketu əsuə, itsyise nyamfo eso Onanto

lékpadi mi óko biyifo bani nɛ. Lɛ nnya əsuə, bɛsɔ Onanto ani. ¹⁶ Bitə lə Kristo eto Ditiki Sɛɛ nɛmə, nə lefo koya tinti lə diyi mi ketu kəmiə. Bete bətsyuə asa, bɛlɛ bətsyuə kələ lə kobe əsuə. Bifi Awɔnisa Kɛnkɛ eto əsə ku bafokanɔfɔ eto əsə ku ləwɔnɔ eto əsə bitə ləninsɔ Onanto lə mi ketu kəmiə. ¹⁷ Nyaso bitə lesa saa nə biɔtɛyi nye buiyifoo, lə ɛyɛ lə Bonamute Yesu əsuə, lə bifi ləninsɔ bitə Boanto Onanto ɛyɛ lə wə diye əsuə.

Bisiə Nkpə Fɔfɔ Fe Mba Ni Kristo Eto Bale Seka.

¹⁸ Mi besensiə, bebokəsə əsuə kasɔ bitə mi bese, itsyise nko diɲyə itə bə biyifo fe Kristo eto bafokanɔfɔ nɛ.

¹⁹ Nko ke, mi bəsiəfi tsyaa, bifi lelabi bitə mi bəsiə. Nya bienyifo mə disiale.

²⁰ Mi bebi, bitsyue anto ku ambe mə koto lə lesa saa əsuə, itsyise nyamfo laakɛ Onanto ókuɛ nɛ.

²¹ Mi bebiantomə, biankpe mi bebi ləblofi bə lə ani lə nyanlo mə.

²² Mi ndomufɔ, bitsyuə mi banamutemə koto lə lesa saa əsuə, inni lə lefe nə mə ənəmi ntəkə lə mi əsuə ete, bə lə batəsə mi lə keyifo əsuə eso, bomuu, biyifo ke ku mi ketu kɛnkɛ lə dibu biətə Bonamute eso. ²³ Nya keyifo saa biuyifoo, biyifo ke ku kafo faa fe Bonamute bɛnlɛ ke buyifo kətə inni utidinini saa. ²⁴ Bekloma biə Bonamute ebofo mi kayo fe kayofofɔ ka ólɛ utsyə utə wə betidi. Itsyise Kristo ni Onamute wə bɛnlɛ busumu. ²⁵ Nya utsyuə saa wə luuyifo kabuaa, ebunyə kayofofɔ itə kabua ka weeyifo.

Itsyise Onanto aakponko utsyuə saa lekpo lə kusu tsyɔntsyɔ əsuə.

4

¹ Mba ni banamute, bɛlɛ mi ndomufɔ ba leeyifo mi nyifo ola lə kusu sɛɛ ko diɲyə itə əsuə. Bekloma biə mi tsya kpe Onamute wə nkpe kato.

Kɔlɛlɛ Ku Kate Eto Asa.

² Bianyɛ ola boto kətə Onanto lefe saa. Bitəkə ənə lə bɛlɛ ola boto lə bifi leninsɔ bikətə Onanto. ³ Beto ola lə bo tsya eto disi, bə lə Onanto lə ɔsini bo kusu lə bofo Kristo eto ditiki nə diyifo lekulasa kɔɔ, nə eso minlabe lə aba eto diyoo, letsya bobɛ kələ ni kate. ⁴ Beto ola bə lə mfo lekulasa nɛmfo buləkə kate lə lekpa wuee fe kase ele bə nyifo.

⁵ Bɛyɛ ku mamfokanɔfɔ lə kobɛ əsuə, lə biyifo kusu saa ko lɔɔsini kutə mi eto keyifo fe kase efe itə. ⁶ Bidi etiki ku dibu, bə lə lɛlɛkɛ bɔnɔ ku koto lefe saa, lə betɛ kase buitə etiki eto mbuayɛ sɛɛ itə utsyuə saa.

Bɔlɛ Mi Bokla.

⁷ Bo ɔyimisani Tasiko lala, wə nwə leeyifo asa lə kusu sɛɛ əsuə ku uyifoyifotsyuə lə Bonamute eto keyifo əsuə, eebɔtɛyi mi lesa saa nə nlɛ mɛ bubə lə əsuə mfo. ⁸ Nyamfo eso minlɛ wə bɔtsyese mi ɔflɔ bə lə ɔtɛyi mi bo mfo eto etiki saa nya lə okpe mi otsyekle tsya. ⁹ Onesimo wə ni bo ɔyimi lala wə bofobɔnɔ nwə ni mi nti eto ɔnii, tsya akɔ ku wə balɛ bubɛ. Bɔɔtɛyi mi lesa saa nə nlɛ bubə mfo eto etiki.

¹⁰ Aristarko nwə boko wə nlabə lə diyo mfo ku Marko wə ni Barnaba eto ɔyimisani bə bəəsiəsə mi o-o! Bóotə mi bote kóko bə lə Marko əmfo əbə mi ɔflo, bisensə ani befo wə kafo faa. ¹¹ Yosua wə bensi bakpo Yusto tsya əəsiəsə mi. Mə itsyə bamfo hã ni Yudafɔ eto bafokanɔfɔ ba nɛ keyifo ku mə itə Onanto eto sekakedikɔ kamə nɛ. Beyifo bawunsəkotsyuə tinti bətə mə.

¹² Epafra wə ni mi nti eto ɔni wə ni Kristo eto uyifoyifo tsya nkə wəəsiəsə mi o-o. Woato ola keklege lefe saa lə mi disi katɔ Onanto nkə lə binyə keklege, lə beflo lə kototsyuentsyue Onanto eto ditiki nəmə. ¹³ Mofo wə kenye budi lə keyifo keklege ka weeyifo kətə mi ku betidi ba nkpe lə Laodikea ku Hierapoli. ¹⁴ Bo ɔyimitsyuə lala ofala kplɛ Luka ku Dema bə bəəsiəsə mi o-o. ¹⁵ Bəəsiəsə bayimi ba nkpe lə Laodikea ku Bɔyimisio Nimfa ku bafokanɔfɔ eto ditsyukpa nə laakpe disi lə wə diyo o-o.

¹⁶ Lə bekla kukue komfo belosəə, bifi ko betsyese bafokanɔfɔ eto ditsyukpa nə nkpe lə Laodikea lə mə tsya lə bakla. Nko kee, mi tsya lə bekla kukue ko míwɔni míntə Laodikea eto bafokanɔfɔ eto ditsyukpa tsya.

¹⁷ Nya lə betɛyi Arkipo biə lə okpe otsyese lə olosə Bonamute eto keyifo ka úfi ókpe wə lə ani mfó.

¹⁸ Mɔ, Paulo, kosate dífi mə kɔni minɛ kəsiə kamfo bɔwɔni katsyese mi. Nya bianta əsue biə nsi nlabə lə aba eto diyo. Nɛ Onanto bɔtɔ miə utə lə wə lefonə lə disiəko mi.

**Onanto eto kakle fofɔ; Sɛkpɛle
Sekpele: Onanto eto kakle fofɔ; Sɛkpɛle New
Testament**

copyright © 2008 Wycliffe Bible Translators, Inc.

Language: (Sekpele)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Sep 2022 from source
files dated 13 Jul 2022

5fc03d2a-3cf8-5607-a6e0-9e1e197140bd